



*Senin, 03 April 2023*

**Siman Ogen: Hosea 12: 1-6**



**Iukum Erkiteken Lagu Langkah**



**L**anai asing man banta kerna kata etika. Etika e me usaha manusia guna ndarami norma baik nta pe buruk. Etika ndarami ukuren baik ras buruk i bas lagu langkah manusia. Etika e me manusia janah objek formana (bentuk) e me perbahanen manusia. I bas menentukan perbahanenna, manusia terkena pengaruh luar si erbansa maka ia pe sadar maka ia makhluk si erbatas i bas menentukan kerna baik ras buruk. Terlebih apai ka ia tinepa Dibata, maka tindakenna pe ergantung bas Dibata nari. Bageme si terjadi i bas bangsa Israel, kebebasanna lanai bas ketentun Dibata tapi kebebasanna nggo itentukan bagi ate-atenana saja. Penipun ras perbahanen si rawa-rawa ertambah-tambah piahna nembah ate Dibata. Terlebih ka ia erbahan perpadanen ras bangsa si deban, labo Dibata. Emaka Hosea ngatakensa kai si ilakoken bangsa e desken permakan si mpermakani rarasen angin ntahe perburu singayak-ngayak angin si kerinana enda e me sea-sea, la lit ertina.

Emaka la banci lang bangsa Israel arus iukum erkiteken lagu langkah si la ngena ate Dibata. Amin bage gia lit denga keleng ate Dibata man bana, maka nina Dibata erkelangken Hosea, maka mulihlah kempak Dibata dengen tetaplah i bas kekelengen ras keadilan. Arah si e si eteh maka kegeluhenta enda labo banci bagi ate-ateta saja ntahe kebebasan yang kebablasan. Selaku tinepa Dibata ras kalak si tek, maka kita enda terdeterminasi (ditentukan) Dibata. Adi la lit ketentuan i bas Dibata nari, maka tentu labo pernah lit hubungenta ras IA. Emaka bebas pe kita, e me kebebasan si ertanggung jawab si tetap ncidahken perbahanen ras lagu langkah si sentudu ras si ngena ate Dibata. E me jadi etikanta.